

A don Antonio Solinas: Poeta de s'amore

16.07.2012

(DECIMA GLOSSA)

In-d-un'iscuta 'e dolore
cunfortende unu mamentu
cun totu su sentimentu
ses poeta de s'amore.

A su Deus Soberanu
che teracu as aporridu
sa vida tua, cumpridu,
sempre ch'esserat beranu,
a giuntas sa paghe in manu
l'as torrada cun valore
preighende " Est su fiore
chi poden sol'ammirare
sos ch'ischin finas amare
in-d-un'iscuta 'e dolore".

Cun cussa 'oghe in coro
m'as giamadu a sa lughe
e cuss'omine in rughe
peraulas t'at dad'in oro,
ca b'as b'idu unu tesoro
po chi est in patimentu
e cussu pane a sustentu
a s'ultimu che a mie
m'as dadu ispera una die
cunfortende unu mamentu.

Sa chiterra est sempre a tonu
arrumbada a su cuzone
paret nende cun passione
"cun Antoni aiat donu
chi fit dulce cun su sonu
ch'a su tempus fit atentu "
ca mi torran in s'ammentu
notas che pregadoria
dedicadas a Maria
cun totu su sentimentu.

E lughe as intratesu
cun ojadas, cant'apentos
lis as dadu, a mamentos
cand'afaca, cand'atesu,
a las bider no ant pesu
ma impresas de lugore
t'an mustradu su Signore
chi cun Fide as tentu 'ias
e in Chelu, incue sias,
ses poeta de s'amore.

A cara 'e su mare so cuntentu

Menzione d'onore: 1 ED. Sindia Premio " Su Casu" 18.12.2010

In cust'isterrida 'e mare cun rena,
a car'a sole, sas frinas lezeras
mi dan agaju cun undas fieras,
paret sa 'oghe intender de sirena
chi s'ànimu m'aeschet cun sa pena,
oras assazo in su dolu lieras.

Lùghene roccas in oro pintadas
in lidos chen'umbraghe desolados
los ant bentos gioghende ricamados
umpare a lintas de undas fadadas,
de su tempus sunt peutas lassadas
in assimizu de pintos famados.

In custa cama, in logu 'e incantu,
non bi penso a s'ìerru, a su frittu
a dies chi m'ant a dare atitu
ma nde remuno iscutas de ispantu
ca cussu ch'ido 'e sa natura a bantu,
est ermosura chi lassat appitu.

Lass'oriolos in s'oru 'e su mare
che irminas, ischende chi carignos
isfustos nd'ant a iscontzare signos,
a s'and'e torra bisos de ninnare
vigore lean po mi cuntentare
cun prommissas noales e dissignos.

Non morin sas isperas a s'ocàsu
ca arcanas majias at sa luna
cun ojadas bi chircan sa fortuna
duos coros unidos in d-un'asu
abbratzados in laras chircan pasu
mirèndesi un isteddu tott'in d-una.....

....s'atzenden ischintiddas in su fogu
cun lughes de braja a moristuda,
in s'aera ch'est neta, pius nuda,
cussas prellas tenzende a disaogu
nde bisan culilughes in su jogu
in carrelas chi sunt sempr'a sa muda.

Inoghe no est logu de lamentu
ca torradu so piseddu cun brios
tenzo su risu in chizos de sos bios
e a cara 'e su mare so..... cuntentu!

Ca ti tenzo in su coro

“Premio Speciale Per i poeti del Meilogu” Premio Seunis–Thiesi 2009 XV EDIZIONE

Si mi ponzo a cantare
ca ti tenzo in su coro
rimas dendedi 'e oro
istamus sempre umpare.

Non do rimas a s'accua
ma lieras che s'aera,
no est bisu o chimera
ma a sa belles'attua:
ca in presentzia tua
si proo gosu a cantare
non chelz'in dolor'istare
ca tenz'in coro allegria
m'as affacca in cumpagnia
si mi ponzo a cantare.

E dare podes a mie
un'iscuta de ispera
cun nd'una 'oghe lezera
cantamilas ogni die
ca pensan solu a tie.
Liga a mie su destinu
tue chi as de divinu
ca ses fiore 'e s'eranu
ermosura ap'in manu
ca ti tenzo in su coro.

Cun su semene 'e sa vida
mi ses siendas porrende
e cun prellas ghia dende
chi 'e gosu t'an bestida.
Una rosa est fiorida
in domo e in su sinu
chi t'ilgiarit caminu,
nd'as da-e su sole bantu
finas s'umbra nd'at incantu,
rimas dendedi de oro.

No est su cantu 'e dolore
chi a penas dat cunsolu
cun megus lea su 'olu
a su nidu 'e s'amore
ca cun tegus at valore,
non mi fetas isetare
in festa sempre istare
cantende apassionadu
finas tue mi l'as nadu
istamus sempre umpare.

Che lampu das lugore

Menzione Premio Logudoro Ozieri 2014 - (*Poeta: testimonzu de su tempus*)

Cun s'ojada che lampu das lugore
a pensos incubidos de costou,
a su tempus chi ti nde dat de sou
innidu bi lu torras cun sabore.

S'apitu cundidu abbistu li rendes
ca in su coro as àpidu fortunas
medende passos dissignos nd'isfunas
e carignos in s'ànimu nd'intendes.

Pedis a bisos, ch'in pasu ti tinghen
finas sos chelos de su pensamentu,
chi bizen lughes ca sempr'in fermentu
ses cun bideas chi lieras chinghen.

Cun profetu in iscutas de recreu
cussas bellas a s'acua nde furas
a sos sentidos s'amore asseguras
ca non lis as in sinu post'anneu.

Sa peràula ainnanti lis pones,
de veridade sàbia l'oferis
a sa rejone sa gianna l'abberis
illacanada de sas bisiones.

E meledende pintos alimentas
ca lis agatas unu dulce amparu
in su versu bramidu chi t'est caru
b'infioras isticos e sementas.

E sos sèmenes brotan de s'aficu,
da' sa càscia ti fuin a s'apretu
ca no 'intras cun bàtimas in pretu
intendere nde podes su repicu.

Cun fiamore mi das a pensare
a fren'isoltu cun tuos lampizos
e in consonu a tèbios disizos
ap'unu logu inue remuzare.

In memòria mi nde das abbojos
de su passadu ch'ancora remunis
a su piaghene allutu m'ammunis
de lu tenner presente sempr'in ojos.

Deo chi nd'ap'apresu sos tocheddos
non lasso versos tuos in olvidu
a su progressu de novas ansidu
nde do cun giudu istigas e soneddos.

Consolu

Menzione d'Onore: 3 Ediz.premio poesia "S'ISCIAREU" - FLUSSIO dicembre 2010

Ite sunt sos sentidos ch'ap'in coro
chi dies aumbradas so passende
cun nues atturadas chi sunt dende
a lamentos sas peleas issoro?

Accolla s'abba, millu su tesoro
chi fia dae su chelu isetende,
beneita sa terra ch'est retzende
sos buttios ch'in laras assaboro.

In su mudine non m'intendo solu
e pesso, pesso ma sa lughe ebbia
s'est in aeras netas accherada

in s'animu po mi dare consolu,
a iscaldire sa pessone mia
de su sole mi bastat un'oiada.

In alas de fantasia

*TRINITA D'AGULTU 29.01.2011– 2°Premio L. COSSU – BOCCI DI LI MIMORI
(decima glossa)*

Chi semus umpar'olende
chen'alas in sos isteddos
mi lu narant sos piseddos
chi cun nois sunt gioghende.

E si ch'andant sos istios
chi fint fogu cun a tie,
s'ièrru id'e su nìe
ca m'enin mancu sos brios
ma cun tegus torrant bios
c'affettu mi ses mustrende
in laras mias lassende
afficcu in cussu asu
cantu mi lassat in pasu
chi semus umpar'olende.

Su risu a ti consolare
in alas de fantasia
tes intender s'allegria
ca t'est gosu de pensare
cun nues de passizare
in chelos mai nieddos
cun majias de faeddos
e naras in bisos tuos
chi de coros nd'ides duos
chen'alas in sos isteddos.

Avantzende est s'edade
chi nos giughet a betzesa
ma su don'e sabiesa
nos mantenet s'amistade
che frade ch'aggiuat frade
brincamus sos iscameddos
ca prommissa fit de aneddos
cun sa manu in sa manu
po a nois est semp'r'eranu
mi lu narant sos piseddos.....

....chi che prellas lughen como,
a los bides sos nebodes?
Ite flores ! Ant sas dodes
che su sole chi fentomo
bettan lughe a sa domo
ogni cuzone iscaldende
e ca semus iscultende
de rusignolos sa oghe
sunt puzzones de inoghe
chi cun nois sunt gioghende.

Làgrimas de su coro

2° Premio Flussio 2014 Sez. otavas – 13.12.2014

Sas làgrimas istimo che-i s'oro
ca mustran nuda e giara s'amargura
cun dignidade lis do bantu a fura
in cara las ammiro e las onoro.
Dend'isfogu e cunfortu a sa tristura
semper ladinis in s'umore issoro
nd'ap'assazadu frutos e sabores
lòmpidos a su sole che fiores.

Cando falan in chizos, mai invanu,
las bido a fiancu 'e penas cun giudu
totu sunt caras e mannu est s'agiudu
chi dan a pensos cun faeddu arcanu.
De su chi naran mai nd'ap'impudu
ca las intendo cun s'ànima in manu
suguzende disizos dae nou
cun s'intentu de los ponner a prou.

Benènnidas cun seru a su piantu
chi non timet cust'ànimu cunfrontu,
si de peleas nd'at finas s'afrontu
su suore li dat briu e ispantu
cun su coro a s'amore sempre prou
ca mai dae bramas si nd'est frantu
e cun prellas chi benin a s'abboju
agato paghe fintz'in su toroju.

Lughes e umbras

Premiada cun Menzione a Ossi in su Premiu A. A. Cucca 2011

Falende in s'orizzonte rie rie,
non mi dare lamènta oe m'at nadu.

Medas bisos mi torran cun sa die
ca cuss'uju che cravat abbramidu
sos rajos, lèstru, lèstru, in d'ogni nidu,
e in chelu la faghet de padronu
da sa chima abbaidendem'in bonu
mi narat " cun apèntu sighi a mie".

Rie rie falende in s'orizzonte,
non mi dare lamenta oe m'at nadu.

Li ponzo fatu in àltu in su monte,
e in risu gioghènde si ch'istejat
in su mare tra sas undas m'agheiat,
e de isfados nd'agato su pasu
mirende umbras finas a s'ocàsu
in solianos cuzones de fronte.

Non mi dare lamenta oe m'at nadu,
falende in s'orizzonte rie rie.

E nde 'ido peutas ammajadu,
cun frommas chi an domo in totue
ap'a bider sa càra 'e isse incue
ma sa sua non b'est, istigas solu
lassadas a sa lughe a consolu
e s'animu a mie m'an mudadu.

M'at nadu oe non mi dare lamenta,
falende in s'orizzonte rie rie.

A làcanas a pàre a manu tenta,
a sa nuda umbras passizan e lughes,
in nd- unu pizu 'e tèrra cantas rughes
ca de siendas zente non nd'at paghe
e cun intragnas 'e su faghe-faghe
cando mai at a esser cuntenta?

Rie rie in s'orizzonte falende,
lamentà oe m'at nadu non mi dare.

Mi ses in mustra preguntas lassende,
trème trèmè, insùsu 'e una nue,
intra e bessi in su chèlu, fue fue
mi paret chi s'omine no istimes,
e upas suas in basciu nde times,
poite custas dudas mi ses dende?

Lamenta oe m'at nadu non mi dare,
rie rie falende in s'orizonte

Ma s'est s'umbra chi mi dat a pensare
a costazu 'e sa lùghe est de amore
cun pintos chi no àn manu 'e pintore
fatos chena pinzèllu a s'asciùta
in sa cama mi dån pas'un'iscùta,
e sigo a car" a sòle a sonniare.

Mancu paza in sos nidos

Menzione d'onore premiu 'e poesia Dorgali "Bardia" sett. ediz. 2010(decima glossa)

Chena paza in sos nidos
no ant ite manigare,
a si poder cuntentare
lughe pedin tott'unidos.

Est bentu mai attesu
chi si movet cun peleas,
in coro traschiasfeas
m'an lassad'unu pesu,
ca a frades lis an presu
sa 'ucca e sunt famidos,
de pedd'issoro 'estidos
solu aera ingullende
cantas penas sunt proende
chena paza in sos nidos.

Cun sas làgrimas in ojos,
nues de muscas in cara,
ludru che basu in lara
s'abba tastan dae pojos,
in sonnios mi dan abbojos
e dudas a mattanare.
Deus t'apo a preguntare
aggiudu a iscameddos
ca sunt babbos, sunt piseddos
no ant ite manigare.

Si cumpagna li ses, luna,
in su mudine, in s'isettu
de iscuttas chen'aprettu
mùstralis, tue, fortuna
ca nde sunt a sa dijuna
de siendas ch'ischin dare
consolu in su proare
chi sas cosas ant amore
mancari lessant dolore,
a si poder cuntentare.

Dias, sole, un'oiada
a su coro ch'an in manu
ca lis est tzoche in vanu
po unu bìcculu 'e pane
chi non mancat a su cane,
ca s'in caldu sunt retzidos
in sas domos accudidos
òmines torran cuntentos,
oe e cras chen'istentos
lughe pedin tott'unidos.

Narami ancora....

(a babbu)

Bolados ti che sun sos beranos,
e como chi ti ses arressu
in mesu a sulcos che los bides
ancora,
in bisos ogni die
nde redorches sas chervas
inue deris b'as'afundadu
cun coro sas manos
po amparare su semene
dae sas trassas de su tempus.
Medas caras boghes as coloridu
umpare
cun tatzas ammeradas
dae una 'innenna,
e cantas rughes ch'as bogadu
chi fin isfeschidas in felenu
po ponner paru a unu disacatu!
Deo, adaisequs a sas peutas tuas,
nd'iscultaio in sa 'oghe unu cantigu
de poesia che pregadoria
e in cuss'iscuta
nd'acabidaio
s'errosura de s'avreschida
a cabu de su manzanu,
e a sero t'idio
torrare dae mama,
cumentu!
Fit fada
e li porristi sas bertulas
garrigas de incunzas,
sas fadigas tuas.
Como chi no as pius suores
de t'asciutare,
e su sole...
lu ides dae sos bidros,
narami...
cussu chi non m'as raccontadu
po chi pota leggere
in sas crispas giaras e asseliadas
de su mare tou appasigadu.

Oros de Sardigna (Sardegna e dintorni) - 1° premio ex aequo del Premio Osilo 2014

Cantos! Cantos de bisos e valores
mi das Sardigna cun totu su coro.

Si l'ischeras... a tie amo e adoro
ca mi porris fiores a biseras,
a tie amo e adoro, si l'ischeras,
s'asulu 'e custu mare chi m'est notu.

Cantos! Cantos de bisos e valores
cun su coro Sardigna mi das totu.

In ojos de lidones apo annotu
rodiados da' 'olos de puzones,
apo in ojos annotu de lidones
e in cara sos moros a insigna.

Cantos! Cantos de bisos e valores
cun su coro mi das totu Sardigna.

S'identidade chi tenes benigna
onoro e non trascuro ca sun benes,
benigna s'identidade chi tenes
t'an dadu cun sa limba gos'e bantos.

Sardigna mi das totu cun su coro,
cantos de bisos e valores... cantos.

Sas pedras a su 'entu dan ispantos
de custa terra mustran su talentu,
dan ispantos sas pedras a su 'entu
testimonzas ancora de lugores.

Sardigna mi das totu cun su coro,
cantos de bisos e cantos valores!

Intelletu, costumen'e colores
an mantesu sabiesa e segretu
costumen'e colores, intelletu
de nuraghes balentes sunu risos.

Sardigna mi das cun totu su coro.
Cantos valores! E cantos de bisos.

De telarzos, de fusos e acisos
nd'ido in mantas fioridas sos usos,
de telarzos acisos e de fusos
sun frunidos ricamos cun decoro.

Cantos! Cantos de bisos e valores
mi das Sardigna cun totu su coro.

Piantos.... chen'impudu

2° class. 20 ediz. premio poesia "Prantaferru 2011"—Paulilatino

Sa die m'at cun chilcios pres'in coro
a oras so ligadu chi non colant
e in alas de tristuras si ch'olant
iscutas chi ant peleas issoro.

Umbras covacan su sol'e su chelu
e isfadu apo ainnant'e ojos
oe mi dan matanas e abojos
sa mente oscurendemi cun velu.

Sunt in buluzu nues aturadas
e in s'aera nd'ido già su fogu
chentza intopu, chiberas leant logu
sas ischintidas lughidas venadas.

Pioet, e piantu est po a mie,
ma butios de aba sunt amore
chi calmant a sa terra su sicore,
e pasu nde ap'aer, dae chie?

Gai sas prellas mi narant cun sonu
"ancor'ischimus finas pianghere!"
Cumpagnia no amus a franghere
isetende chi torret tempus bonu.

Como in afannu l'intendo su 'entu
e su remore ch'at atesu giùtu
lassend'istillas in terrin'asciùtu,
sas mias a blandare cun turmentu.

" 'Essinde sole! Ca cun nd-un'oiàda
sos trastes mios podes iscaldire
no est indonu, mi bastat ischire
chi b'est sa lughe, non si ch'est andada."

T'iseto a s'avrèschida a consolu
lughid'istella, in altu mai istraca
e mi setzo in carrela e t'ap'afaca,
ca foghile mi faghes in su dolu.

E a penas das briu cun fiamas
ch'aiz'aizu iscaldende m'ammentan
manzanos solianos e cuntentan
s'animu ch'intro a mie chircat bramas.

Ben'ennidu ses beneitu agiùdu,
in nd-unu ispantu milla s'allegria,
unu raju luego mi dat ghia
e non nd'apo de sos piantos impudu.

Pien'e sole cras bido beranos

Menzione d'onore a Ozieri 19.12.10 "Premio Logudoro XXIX EDIZ." TEMA ISPERAS DE SUORE

Cant'apo in vida realizadu
est fruttu de tribagliu cun suore
non sempre dulch'a boltas cun dolore
est 'istadu patidu unu regalu
chi cumpensaiat s'jerru malu
incunz'a cant'aia isperadu.

Pien'e sole cras bido sos beranos
po cussu fizu ch'est pensamentosu
ca de s'istudiu fattu nd'at su gosu
abert'a connoschentzia che ischente
at regoltu su suor'in sa mente
po dare 'onas proas cun sas manos.

"Cherz'intrare in sas tuas bideas
cando in cussas paginas a perras
las aprendes a bolu e las afferras
e prima chi si che fuan trattenes
su sensu 'onu e puru sos benes
chi chena lacanas a mod'impreas."

"Non disisperes mai fizu caru
ca po a tie b'at un avvenire
e sas peleas tuas an a finire
chi sa dicioza sorte t'at a dare
su sacrificziu fatt'a istudiare
ca d'insinzos non ses bistad'avaru."

"Si unu cras ch'as a esser attesu
m'at a torrar'in mente cussu 'asu
ch'ancor'a mannu mi torrat su pasu
cunfortende una domo istracca
e ca s'amore tou ap'affacca
cun s'affettu sas trachias m'as presu."

Si su 'entu est frimmu in s'aera
e no pisulat nuscus de suores
un'avreschida noa 'e valores
cun linfa currend'est in sas venas
ca sos piseddos chi non timen penas
in caminu agatan estr'e ispera.

"Già t'ido in manu ranos de oro
chi seberas in mes'a sas ispinas
cun s'amada nd'as aere istrinas
ca siendas porridu t'ap'in coro."

Piseddos totta vida

“SEGNALAZIONE al Premiu Logudoro OZIERI XXVIII EDIZ

Iscahende abbistu sas peleas
ch'iscuran sa mente e dan fastizos
dae piseddu post'ap'in chizos
su risu cun siddados de ideas.

Rajos de sole mustran incantos
de Deus in su manzanu lughente,
cun coro de pitzinnu innotzente
nd'abbratzo ogni die sos ispantos.

M'incamino cun animu lieru
ansidu, chirchende sa novidade
si m'isterrene manos d'amistade
chi m'accumpagnan chiet'e fieru.

Ponzende cabia a sas isperas
chi mi ligan'a tie cun destinu,
su chi nd'assazo est fruttu divinu,
cun tegus nd'agato oras lieras.

Brotat su semene, naschet sa vida,
disizu cun s'amada s'est cumpridu
isetu in sinu est fioridu,
de cust'arveschida no s'at medida!

In sa naschida biu est s'incantu
'e fijos e mama ringratziende,
sun siendas chi gosu sun porrende
m'allontanan sa mutria cun cantu.

Accò sas prellas chi lughen in domo
su tempus passo ninnende nebodes,
accò sas ricumpensas cun sas dodes,
c'antzianu sò, mancu nde fentomo!

Apo imparadu a palas mias,
si cun buglia sa vid'est leada
e pagu e lanzu est su chi dada
su bon'umor nd'abblandat sas traschias.

Inghiada l'apo a cussu motu
po nd'aere acchidd'in sa 'etza
s'allegria, in coro, a difesa
e piseddu sempre mi sò connotu.

Lughene nott'e die sos isteddos
cando 'enit sa falche messadora,
rie-rie cun giogos , cuss'ora,
in ninnos mi che dromma 'e piseddos.

Sa domo de su sole

MENZIONE a THIESI (decima glossa)

Premio "SEUNIS" 2010

L'an in terra abandonadu,
chena briu ne calore,
cun sas bozas de s'amore
a sa luna ch'est pigadu.

Duos coros in s'iscuru
ch'in vida no an fiore
cun disizos de amores
regoltu an issos puru
unu frutu già maduru
chen'afetu, desoladu
ch'in nd-un oru c'an lassadu
unu babbu, una mama
sentza gosu e ne brama
l'an in terra abandonadu.

S'ingrata est sa natura
b'est chie donat isperas
po chi sas dies lieras
li cumpenset s'amargura
e si at sa pedde iscura,
non li negan su colore
nd'iden fina su lugore
in pitzinnu chen'isetu
chi connotu at s'apretu
chena briu ne calore.

De su sole est sa domo
e b'atopat ogni die
ca foghile at tentu inie
cun sa braia chi fentomo,
cuss'aficu 'ido como
chi est prella, est fiore
paschidu in su lentore
suende anzenas titas
mai sun 'istadas fritas
cun sas bozas de s'amore.

Sun sas lagrimas che s'oro
si curren cun poesia
dend'umore a cussa cria
mustradu l'an unu coro
e si no est fiz'issoro
'idu b'an unu siddadu
da niunu fentomadu,
ca cunfortende un anzenu
torradu lis est s'alenu,
a sa luna ch'est pigadu.

Sa manu ti do cun fiore

Premio Letterario Osilo 2013 - 2° Premio Sez. in Rima

A tie 'ido in dolu. Alas cun su 'entu,
una man'eo ti do e fiore.

Mi das ancora alenos e premore
e nd'apo proa in sentidos serenos,
premore mi das e ancora alenos
in sentidos serenos nd'apo e proa,
che die noa a coro mi los leo.

A tie 'ido in dolu. Alas cun su 'entu
ti do, una manu e fiore deo.

Como a sas grascias de sos ojos creo
e sas bellas tuas ti fentomo,
de sas grascias creo a sos ojos, como
ti fentomo de sas bellas tuas,
de lughes duas, de oro però.

A tie 'ido in dolu. Alas cun su 'entu,
una man'eo e fiore ti do.

Accò su sole chi t'est notu, accò
est in saludu e in paghe cun totu,
accò, accò su sole chi t'est notu,
in paghe cun totu est e in saludu,
millu s'agiudu, milla sa fortuna.

A tie 'ido in dolu. Alas cun su 'entu
deo ti do, fiore e manu, una.

Dies bellas in cara nd'apo in d-una
si mi mustras imprentas che istellas,
in cara nd'apo in d-una dies bellas
che istellas si mi mustras imprentas
a tie tentas che sole 'e beranu.

A tie 'ido in dolu. Alas cun su 'entu,
fiore deo ti do e una manu.

Sas nues in chelu andan a pianu
figuras paren chi sian d'anghèlu,
andan sas nues a pianu in chelu
paren d'anghèlu chi sian figuras
e bonas uras semper nd'as in palas.

Una man'eo ti do e fiore
a tie. Cun su 'entu 'ido in dolu alas.

In pasu como chieta ti falas

e a furu ti nde leo unu 'asu,
como chieta ti falas in pasu
e unu 'asu ti nde leo a furu
ca so seguru, chi non ti nd'ischido.

Una man'eo ti do e fiores.
a tie. In dolu alas cun su 'entu 'ido.

A manu tenta cun tegus m'achido
e ballende ti nde pesas cuntenta,
m'achido cun tegus a manu tenta,
cuntenta ti nde pesas e ballende
ca mi ses dende cun passos apentu.

Una man'eo ti do e fiores.
Cun a tie 'ido alas, su dolu in 'entu.

Afaca t'isto unidu in sentimentu
cun notas e non t'ido mai istraca,
in sentimentu unidu t'isto afaca
e mai istraca non t'ido cun notas
ca las adotas las cantas a mie.

Una man'eo ti do e fiores.
Cun dolu 'ido alas, in su 'entu a tie.

Cun istrinas mi cuntentas sa die
e colores e risos chi presentas
istrinas, cun sa die mi cuntentas
chi presentas, e colores e risos
sempr'as acisos in cara e non solu.

Una man'eo ti do e fiores .
Alas cun su 'entu 'ido, a tie in dolu.

Cun fiamas das oras de consolu
e mi sun caras in coro ca m'amas,
das oras de consolu cun fiamas
ca m'amas, e in coro mi sun caras
e semper giaras ti dan isplendores.

A tie 'ido in dolu. Alas cun su 'entu,
una man'eo ti do e fiores.

Su battente 'e domo mia

3° Class. - 21° EDIZ. Anno 2012 - Premio Poesia Prantaferru – Paulilatino

Chirco in pensos lugores de s'istiu
ca dies mutzas m'avreschen in coro
e nues cun su mudine issoro
mi ch'inserran sentidos in s'iscuru
lassend'iscutas chena gana puru
cun dudas punghinosas in afiu.

Cun inzomos non so mai cuntentu
ca upas mi dan isporos e chertos,
si in piantu naschimus già fertos
mi pregunto de sas penas su bundu
c'avreschende cun carignos su mundu
restat poi in currutos chen'alentu.

Mudu s'acherat e de tant'in tantu
su dolu a sa janna 'e domo mia
e cun mutas chi 'eo non cheria
a su batente insistit tzochende,
e ladinu in s'ànimu m'est nende
cun sa paghe sol'inchas su piantu.

E in sa càscia sonat a repicu
cun bàtimas chi non tenen segretu,
millu su coro abertu a s'arresetu
a manos giuntas tentu a s'amore
e in làstimas nd'ido su valore
cun sos sèmenes chi brotan s'aficu.

E los sebesto po no esser legu,
cun pessu chena manu los isterro
e sa sustàntzia abistu nde aferro
po non los dar'in podere a su 'entu,
e cun sas tramas de su sentimentu
cussas prendas impito cun sussegu.

Como su sole mi torrat ispantos
cun bàntzigos de lughes, e non pasat,
chena bacanu finas nues 'asat
sentza chi si nd'ismèntighet mancuna,
e deo cun tocheddos tot'in d-una
nde miro de sas umbras sos incantos.

Su risu pone in bia

Menzione d'onore - 22 Edizione 31 AGOSTO 2013 al Premio di Poesia Remundu Piras -
Biddanoa Monteleone

Po apentu su risu pone in bia
cun sos colores bios de sa rosa.

Cando sos ojos aberis dicioza
cun fiores in cara mi nde feris
dicioza cando sos ojos aberis
bido in istellas logos chi sun mios.

Po apentu su risu pone in bia
cun sos colores de sa rosa 'ios.

Si riende m'abratzan chentz'afios
mai lagrimas inoghe mi lassan
riende chentz'afios si m'abratzan,
cumpensendemi 'e totu sos suores.

Po apentu su risu pone in bia
de sa rosa cun sos bios colores.

An de s'eranu pintos e lugores
e paren fatos da' Deus a manu
pintos an e lugores de s'eranu
chi nd'est fintza su chelu in allegria.

Cun sos colores bios de sa rosa
po apentu su risu pone in bia.

Mi sun caros ca tenen fantasia
e m'atzenden sas ganas semper giàros
ca tenen fantasia mi sun caros
selenos ti los miro ogni mamentu.

Cun sos colores bios de sa rosa
pone in bia su risu po apentu

Cun basos de fortuna so cuntentu
ca su sole presentan e sa luna
so cuntentu cun basos de fortuna
chi die e notte lughes apo in bisu.

Cun sos colores bios de sa rosa
pone in bia po apentu su risu

Benes an in s'isfadu cundivisu
ca sa vida unu coro lis at dadu
an cundivisu benes in s'isfadu

bramende amore e paghe in ogni cosa.

Po apentu su risu pone in bia
cun sos colores bios de sa rosa.

Si su chelu abratzamus

Poesia premiata con Menzione a Sindia " Premio su Casu" 16.12. 2012

Si su chelu abratzamus,
amada, cun isperas
chena pensos, cand'essin sas istellas
ischidados restamus.
E sunt oras lieras
ca cun fiamas in su coro prellas
lampizos nos atzenden
e cun ammaju in s'aera los prenden.

A s'iscuru dan risos
colorededi venas
de prendas, e cun pagu ti cuntentas
imberriende bisos
cun iscutas amenas
atesas, e cun fiamore tentas
finas ojos issoro
ca chena chizos dan tzinnos de oro.

Chena lamentos morin
lampalughes otona,
e cun làgrimas de fogu e de uras
aficos ti fiorin
ca gosende 'e cust'ora,
chen'isporos, a s'aera li furas cun passione alenos
e mi los porris in bozas serenos.

Milla sa luna incue,
donosa cun lugore!
Cun d-unu lampu che semus inie,
chentza peruna nue
cun su sol'in amore
notesta finas a sa fata 'e die
nos afadat sa cara
ca basos paren l'essan dae lara.

Un incantu ses tue,
allegra, cun sa 'oghe
mutos l'intonas apassionada,
como dae totue
acudin ainoghe
pastores chi si l'an ismentigada,
ca sa luna est in terra
a tonu 'e notas cantend'a chiterra.

Teresa Mama de coragiu

2° Premio- Setzione: Gigi Sotgia Poesia Religiosa Premio Logudoro OZIERI 2012

Po blandare su dolore
fat'as donu de isteddos
in isperas a piseddos
chentza nde chircar'onore.

Una terra, s'Albania,
fiza 'e Deus t'at pesadu
giovanedd'as caminadu
chena babbu, chena ghia
cun su coràgiu ebbia
siddadu as fat''e s'amore
cun fide a su Signore
leadu as vocatzione
in d-un atera nazione
po blandare su dolore.

De Gesus fisti s'isposa
e fat'in vida l'as votu,
fizos trumas nd'as connotu,
Teresa, sempr'amorosa
che una Mama diciòsa
in terra de iscameddos
a nudos chena soneddos
in chirch'e paza e ranos
cun tuas umiles manos
fat'as donu de isteddos.

Sorres medas t'an sighidu
in disterru de lamentos
como istranzos sunt cuntentos
ca pan'e binu ant retzidu
affligidos chena nidu
mancu tunciòs ne faeddos
bidian chelos nieddos
ca chen'alas fin 'olende
com'a s'Indià las sunt dende
in isperas a piseddos.

Cantas dudas tue puru
as proadu, a sa cua,
non parias fiza Sua,
tra tie e Isse unu muru
e b'idias sol'iscuru,
ma regolt'as su fiore
in piàntu in su lentore
fentomadu da niunu
e Santa t'an fat'in d-unu
chentza nde chircar'onore.